



怪縊(kuài-tsuàh)的蟲豸(thâng-thuā)

有一句話講：「蟲豸嘛是一世人。」意思是講，蟲豸雖然下賤，嘛是一條性命，咱人愛珍惜性命。對這句話共看起來，咱是將蟲豸看做下等動物，就無認真去了解。其實，蟲豸的種類非常濟，性質嘛真奇怪，會當講蟲豸就是怪縊。

我這馬就來講怪縊的水司公(tsuí-sai-kong)，這種動物華語叫做『豉蟲』，這是因為伊一身烏烏，看起來親像烏豆豉仔。伊的怪縊就是伊佇水面盪玲瑯(sèh-lin-long)，盪無停，嘛因為按呢，咱的話才共伊叫做水司公，專門佇水面做司公戲的司公。

這是按怎講咧？咱想看覓咧，無論是大戲、歌仔戲抑是司公戲，拄開演的時攞是鑼鼓齊鳴，鬧熱 tshī-tshā，佇這陣主角入場。伊入場就先佇台頂盪圓箍仔，踏四角，向四方位的觀眾招呼，漸漸鑼鼓聲較恬(tiām)矣，伊嘛停步落了，唱一條曲調，閣自我介紹一番，按呢就開演囉。

就是按呢，佇舞台頂盪圓箍仔是開戲的套頭，毋過這隻水司公真怪縊，伊一直佇水面盪，盪無停，根本就無欲做戲，騙觀眾跔遐貓貓相，所以咱就共這款套頭叫做「水司公做白賊戲」，意思是講這是做假的、欺騙社會的。水司公佇水面盪玲瑯，無閒 tshī-tshā，毋知咧無閒啥物，這真成華語一句：「忙得像無頭蒼蠅。」確實是按呢，所以咱的俗語嘛有：「無閒甲親像水司公。」

回轉來講咱人的世界，咱的頂司定定會共咱講：「少年的，你若認真拍拚，我一定會共你升官加薪。」下跤手人就「無閒甲親像水司公」，頭面頂人煞有可能是「水司公做白賊戲」，平平是水司公，命運卻是大不同(tāi put tông)，可見佇大千世界，蟲豸真怪縊，下跤手人真歹活。

作者：邱文錫

☆詞彙學習☆

【怪縊】kuài-tsuàh：奇異、怪異

【蟲豸】thâng-thuā：昆蟲、蚊蟲

【大戲】tuā-hì：北管戲

【盪玲瑯】sèh-lin-long：繞圈子

【tshī-tshā】：語尾助詞，很吵之意

【踏四角】tāh-sì-kak：一種舞台表演方式，分別站定在舞台四方

【套頭】thò-thâu：招式、把戲

【貓貓相】niau-niau siòng：眼巴巴地望著